

URDHËR
Nr. 21, datë 31.1.2019

**PËR DELEGIMIN DHE DISA RREGULLA TË PËRFAQËSIMIT LIGJOR TË MINISTRISË
SË TURIZMIT DHE MJEDISIT**

Në mbështetje të nenit 102 të Kushtetutës, nenit 28, të ligjit nr. 44, datë 30.4.2015, “Kodi i Procedurave Administrative të Republikës së Shqipërisë”,

URDHËROJ:

1. Autorizimet për përfaqësimin ligjor të Ministrisë së Turizmit dhe Mjedisit në proceset gjyqësore kur thirret si palë në një gjykim, lëshohen nga Sekretari i Përgjithshëm, në emër të personit/personave që do të përfaqësojnë ministrinë.

2. Autorizimet për përfaqësimin ligjor të Ministrisë së Turizmit dhe Mjedisit, kur thirret si palë në gjykim, në proceset gjyqësore, në të cilat, objekti i padisë ka lidhje me institucionin e varësisë, lëshohen në emër të personit/personave që do të përfaqësojnë ministrinë, nga drejtuesi i institucionit të varësisë, sipas vendit ku është ngritur kërkesëpadia.

3. Modeli i autorizimit për përfaqësimin në proceset gjyqësore të jetë sipas lidhjes nr. 1, bashkëlidhur këtij urdhri.

4. Përfaqësimi për çdo proces gjyqësor bëhet nga juristë, si dhe përfaqësues nga institucionet e varësisë së Ministrisë Turizmit dhe Mjedisit, nëpërmjet autorizimit përkatës.

5. Përfaqësimi ligjor i Ministrisë së Turizmit dhe Mjedisit në proceset gjyqësore, sipas këtij urdhri, i jep të drejtë përfaqësuesve të autorizuar të kryejnë çdo veprim procedural, të parashikuar nga legjislacioni në fuqi, në kuadër të përfaqësimit në shkallën përkatëse të gjykimit.

6. Përfaqësuesit e caktuar të ndjekin me korrektesi seancat gjyqësore, për sa i takon pjesëmarrjes së tyre, e veçanërisht kontributit provues, paraqitjes së kërkesave, prapësimeve, pretendimeve, ankimeve, rekurseve, si dhe dokumenteve të tjera, që do të ndihmonin mbrojtjen e interesave të institucionit të Ministrisë së Turizmit dhe Mjedisit.

7. Ngarkohen të gjitha institucionet e varësisë së Ministrisë së Turizmit dhe Mjedisit, të caktojnë një person përgjegjës që do të jetë pikë kontakti për të shkëmbyer çdo informacion të nevojshëm, si dhe njoftim për ecurinë e ndjekjen e proceseve gjyqësore, në Ministrinë e Turizmit dhe Mjedisit.

8. Ngarkohet Sektori i Burimeve Njerëzore dhe i Arkiv-Protokollit për vënien në dispozicion të dokumenteve të nevojshme me qëllim paraqitjen e tyre konform ligjit, në cilësinë e provave materiale për proceset gjyqësore.

9. Ky urdhër nuk cenon vlefshmërinë e autorizimeve të lëshuara nga Sekretari i Përgjithshëm i Ministrisë së Turizmit dhe Mjedisit, për proceset gjyqësore në të cilat ky institucion ka qenë palë dhe që kanë filluar përpara hyrjes në fuqi të këtij urdhri.

10. Ngarkohet Sekretari i Përgjithshëm, Drejtoria e Miradministrimit të Burimeve Njerëzore, Aseteve dhe Shërbimeve, Sektori i Ankesave Administrative dhe Gjyqësore, Sektori i Këshillimit Ligjor dhe Monitorimit të Impaktit të Akteve Rregullatore, institucionet e varësisë së Ministrisë së Turizmit dhe Mjedisit, për zbatimin e këtij urdhri.

Ky urdhër hyn në fuqi menjëherë dhe botohet në Fletoren Zyrtare.

**MINISTRI I TURIZMIT
DHE MJEDISIT
Blendi Klosi**

Nr. _____ prot.

Tiranë, më _____._____.2019

AUTORIZIM PËR PËRFAQËSIMIN NË ÇËSHTJEN GJYQËSORE ME PALË:

Paditës:

E paditur:

Objekti:

Në mbështetje të neneve 64–77 të Kodit Civil, të nenit 96 të Kodit të Procedurës Civile, nenit 14, të ligjit nr. 49, datë 3.5.2012 “Për gjykatat administrative dhe gjykimin e mosmarrëveshjeve administrative”, dhe të urdhrit të ministrit të Turizmit dhe Mjedisit nr. , datë, “Për delegim dhe disa rregulla të përfaqësimit ligjor të Ministrisë së Turizmit dhe Mjedisit “,

VENDOSA:

Autorizimin e ...dhe....., për të përfaqësuar Ministrinë e Turizmit dhe Mjedisit, së bashku ose veç e veç, në bashkëpunim me Avokaturën e Shtetit, në të gjitha seancat gjyqësore të procesit me nr. ... akti, pranë Gjykatës.....

Përfaqësuesi ka të drejtë të përgatisë, të nënshkruajë e të depozitojë të gjitha aktet nevojshme procedurale para Gjykatës në përputhje me ligjin dhe në interesin e ligjshëm të palës së paditur, Ministria e Turizmit dhe Mjedisit, të cilën përfaqëson, deri në marrjen e formës së prerë të vendimit.

(SEKRETARI I PËRGJITHSHËM/DREJTUESI I INSTITUCIONIT TË VARËSISË)

